

Veza sa Uzvišenim Allahom

Prošlog petka smo govorili o skrušenosti i hadisu:

من تواضع لله رفعه، ومن تكبر وضعه

Onaj ko bude Allaha radi skrušen i uljudan – Allah će ga uzvisiti, a onaj ko se bude bahatio – ponizit će ga.

Skrušenost se ne može postići bez postojanja iskrene veze čovjeka sa Stvoriteljem. Veze su važne, a njihovo održavanje iziskuje mnogo napora i strpljenja. U islamskom učenju veza se naziva „siletun“, najčešće se govori o „siletur-rahim“ rodbinskoj vezi, koja je opet povezana sa Džennetom. Većina veza uređuje međuljudske odnose. Jedna veza je posebna po tome što uređuje našu vezu sa Stviriteljem. Vjernik treba povesti računa o kakvoći njegove veze sa Allahom, zato što mu od toga zavisi uspjeh na oba svijeta. Na koji način jačati tu vezu i koliko nam je ona važna u životu – tema je današnje hutbe.

Život ljudi je skup sjećanja i veza među njima. Kada čovjek izgubi pamćenje kao da izgubi vlastiti život. Bez obzira na vezu čovjeka sa roditeljima, porodicom, supružnicima, prijateljima i poznanicima – te veze bivaju samo privremene. Pokida ih daljina, smrt ili jednostavno promjena stanja. Sve to tjera na razmišljanje o tome da li postoji u životu neraskidiva veza? Pred kraj života shvatimo da svi odu svojim putem i da jedina veza koja se vremenom ne pokida jeste veza sa Allahom. Jedino Allah ostaje sa nama do kraja. Kao što kaže poznati sirijski alim, rahmetli Ali Tantavi: ovo nije vaz koji se kaže, ovo je rezultat mog dugog promišljanja o smislu životu, koji sam posmatrao kao film na traci.“

Naš problem je u tome što zaboravimo Allaha pa time i sebe zaboravimo, kao u ajetu:

وَلَا تَكُونُوا كَالَّذِينَ نَسُوا اللَّهَ فَأَنْسَاهُمْ أَنْفُسَهُمْ

I ne budite kao oni koji su zaboravili Allaha, pa je On učinio da sami sebe zaborave. (El-Hašr, 19)

Razmislimo o ovom ajetu! Jesmo li sebe zaboravili? Teško nam je čekati nekoga 15 minuta i biti sami! Je li nam to naša duša postala dušman? Čudno stanje živimo, Boga mi! Naš kapital je naše vrijeme! Kako ga provodimo? U onome što nam ne može biti od koristi? Ubijamo vrijeme, čujemo kako neki kažu. To može značiti da smo zaboravili sebe, a to je kazna Božija. Šta će biti s nama, pitamo li se. Ne znam i ne zanima me, može biti nečiji odgovor. Ali vjernik zna! Allah nas je o tome obavijestio! Vjerujemo da naš život nije počeo rođanjem da bi završio umiranjem.

Onaj ko traga za užicima dunjaluka, neće ih naći bez slasti imana (halavetul iman).

Allah, dž.š., kaže:

إِنَّ اللَّهَ اشْتَرَى مِنَ الْمُؤْمِنِينَ أَنْفُسَهُمْ وَأَمْوَالَهُمْ بِأَنَّ لَهُمُ الْجَنَّةَ

Allah je od vjernika kupio živote njihove i imetke njihove u zamjenu za Džennet koji će im dati. (Tevba, 110) Cijena za koju se kupuje Džennet jeste život i imetak.

U drugom ajetu se kaže:

وَمَا كَانَ اللَّهُ لِيُضِيعَ إِيمَانَكُمْ إِنَّ اللَّهَ بِالنَّاسِ لَرُؤُوفٌ رَحِيمٌ

Allah neće dopustiti da propadnu molitve vaše. – A Allah je prema ljudima zaista vrlo blag i milostiv. (Bekare, 143)

Da li je moguće biti na gubitku kada za nešto kažemo da to činimo ili ostavljamo Allaha radi? Može li se izgubiti u situacijama kada svjesno dajemo prednost pokornosti Allahu nad određenim materijalnim dobrima?

Ulema nas uči da postoji sedam nemogućih situacija:

Nemoguće je da nešto ostaviš u ime Allaha a da nakon toga budeš na gubitku.

ما ترك عبداً شيئاً لله إلا عوضه الله خيراً منه في دينه ودنياه

Ne ostavi čovjek neki grijeh ili lošu naviku u ime Allaha a da mu to Allah ne zamijeni boljim od toga na ovom i na onom svijetu.

Nemoguće je da zbog straha od Allaha napustiš neki grijeh za koji znate samo Allah i ti a da nakon toga budeš izgubljen u životu.

Nemoguće je da budeš Allahu pokoran a da zbog toga budeš na gubitku.

Nemoguće je da Mu budeš neposlušan a da zbog toga budeš na dobitku.

Nemoguće je da budeš ponosan na Allaha a da zbog toga budeš ponižen.

Nemoguće je da budeš ponosan na nekog drugog ispred Allaha a da zbog toga budeš ugledan.

Naša veza sa Allahom Uzvišenim je pojedinačna i samo nama poznata.

Jednima se činiš bogobožazan, drugima loš, trećima ovakav a četvrtima onakav!

Ali, istina je da ti najbolje poznaješ sebe. Jedina tajna koju niko osim tebe ne zna, jeste tajna tvoje veze sa tvojim Gospodarom.

Neka te ne zavaraju lijepe riječi o tebi onih što te hvale, nemoj da ti smetaju ružne riječi onih što te ne vole.

Istina glasi:

بَلِ الْإِنْسَانُ عَلَىٰ نَفْسِهِ بَصِيرَةٌ

“Sam čovjek će protiv sebe svjedočiti.” (El-Kijame, 14)

Živimo između pokornosti i griješenja, a opasnost leži u tome da nikada ne znaš u kojem trenu će smrtni čas doći.

Čini pokornost iz iskrenosti a ne iz obaveznosti.

Obavljaj nafilu radi blizine Bogu a ne priznanja.

Tako mi Allaha, pokornost tebi treba. Tvom Gospodaru ona ne treba.

Ne opterećuj se time da te ljudi vole, pa ljudska srca su prevrtljiva. Danas te vole a sutra mrze. Brini se o tome kako da te zavoli Gospodar ljudi. Znaj, ako te Allah zavoli, učinit će da te srca ljudi zavole.

Haram ostaje haram, čak i kad bi ga svi ljudi činili. Ne odustaj od vlastitih princip! Pusti ljude, ti sam ćeš svoj račun polagati.

Zato, ostani na pravom putu onako kako ti se naređuje, ne kako bi ti želio. Ostavi za sebe sakriveno neko dobro djelo za koje niko osim Allaha neće znati da ga činiš.

Znaj kako god su grijesi za koje se ne zna propast, tako su dobra djela za koje se ne zna spas.

لَقَدْ رَضِيَ اللَّهُ عَنِ الْمُؤْمِنِينَ إِذْ يُبَايِعُونَكَ تَحْتَ الشَّجَرَةِ

“Allah je zadovoljan onim vjernicima koji su ti se pod drvetom na vjernost zakleli.” (El-Feth, 18)
Ne čezni za luksuznim mjestima. Najveći samit u ljudskoj povijesti desio se pod drvetom Hudejbijje.

Gospodaru moj, sve moje brige Tebi prepuštam.

Neki alim reče: Molim Allaha u dovi da mi pomogne u mojim brigama, ako mi primi dovu obradujem se jednom, a ako mi je ne primi desetorostruko se obradujem. Zato što je prva moj izbor a druga je Allahov izbor, a On je Allamul gujub - Onaj koji nevidljivo zna.

Lijepo li je pouzdanje i povjerenje u Gospodara ljudi. Allah zna a vi ne znate! U tome je sasvim dovoljan odgovor na našu zapitanost: Zašto se to dešava meni? Zato što Allah zna a mi ne znamo!

Odlazak nekih ljudi iz tvoga života i ulazak drugih ljudi u tvoj život jeste milost tvoga Gospodara. Milost koja se može jedino vremenom spoznati. Godine mijenjaju mnogo toga. Promijene vrhove planina, pa kako da ne promijene ponašanja ljudi.

Da znamo koliku ćemo platu dobiti poslije iskušenja, ne bismo priželjkivali brzo izbavljenje iz njih. Ništa nam se ne uzima osim da bi nam se dalo. Dočekujmo sudbinu riječima: El-Hamdu lillah!

Prvi muslimani su snagu vjere crpili iz tri pravila, vrjednija od zlata.

Prvo:

من أصلح ما بينه وبين الله أصلح الله ما بينه وبين الناس

Ko ima ispravnu vezu sa Allahom ima ispravne veze i sa ljudima

Drugo:

من أصلح سريرته أصلح الله علانيته

Čiji tajni postupci su dobri, i javni su mu isti takvi.

Treće:

من اهتم بأمر آخرته كفاه الله أمر دنياه وآخرته

Ko se brine o onom svijetu, Allah se pobrine za njega na ovom i onom svijetu.

Najveći mogući gubitak jeste da u Džennetu koji je prostran koliko nebesa i zemlja zajedno, ne bude mjesta za tebe.

Iskoristi ovosvjetski život za onosvjetsku opskrbu.

Gospodaru naš, učini našu vezu sa Allahom čvrstom i ispravnom. Amin!

Senad Ćeman,

Hutba održana u Čaršijskoj džamiji, Medžlis IZ Sarajevo

27. rebiu-l-ahir, 1438. godine po Hidžri; 27. 01. 2017. godine po Miladu